

Mo commencé par le Nom d'Allah, Le Gracieux, Le Miséricordieux. Li Le seul Etre a qui nous soumette nous. A part Li pena personne Ki nous adorer ni de ki nous cherche de l'aide. Nous soumission à Li finne libère-nous de soumission à tout autre ki Li. Nous demande Li pou envoie So Bénédiction lor le Saint Prophète Mohammad^{saw} et so bannes compagnons et bannes membres de so famille et tout so bannes suivants sincères ki finne suivre so bannes enseignements dans le passée, azordi et dans l'avenir. Nous aussi implore Allah pour envoie So Bénédiction lor Hazrat Mirza Ghulam Ahmad^{as}, le Messie Promis et le Mahdi. Nous implore Allah pou ki Li aide nous pou cherche la vérité, comprend li et repenne li partout dans le monde. Nou aussi cherche la protection d'Allah contre l'ignorance contre bannes préjugés contre bannes méchants ki utilise la religion pou domine l'esprit de bannes ti dimounes. Nou souhaiter ki Allah envoie la paix lor tout bannes bons dimounes et ki Li aide zot pou sorti de la noirté et Li amène zot dans la lumière.

Depi commencement février 2011, dans Jamaat Ahmadiyya de l'île Maurice pe circule ene lettre (voir page 4-6) ki adresser à moi. Fine donne ça lettre là à bannes présidents de bannes branches et finne donne zot instruction pou donne ça bannes membres pou zot envoie moi ça si zot envie. Alors mo pe écrire ça ti livret là pou mo réplique bannes z'affaires ki pé dire dans ça lettre la. Encore ene fois mo pou expliquer couma bannes dirigeants Ahmadiyya de l'île Maurice pé continué éloigner de la droiture et de bannes enseignements ki zot fine recevoir. Azordi, de par zot comportement, li clair ki ban ahmadis souffert d'ene dégradation moral et spirituel et ki zot enfermer dans ene système ki incapable pou amène so prop reforme. Ena surement plusieurs membres ki pe déplore la situation et ki pe garde l'espoir d'ene redressement de l'intérieur. Li ler pou zot réfléchi ki Quran, Le Saint Prophète et so Messie fine enseigner lor reforme spirituel, et remet en question ce ki fine fer zot croire pendant les 50 dernières années. Mazine bien ki Quran dire ou ki ou pou seul responsable de ou action le jour du jugement dernier et ki pas pou accepter ki ou dire ki ou ti obeir ou chef. Le seul moyen ki Le Messie enseigner c'est ki quand ene Jamaat tombe dans la décadence spirituel, Allah, pou préserve So la lumière, lève ene (ou plusieurs) dimoune de parmi zot même avec le *ruh-ul-quddous* (élève li spirituellement et donne li révélation), et aide li amène le combat pour la droiture. Banne leaders corrompus, pou préserve zot l'intérêt, pou faire li vinne

‘exclus’ mais puisque c’est Allah Li même ki déclenche sa, Li assure So victoire finale. Mo invite zot pou réfléchi bien ki c’est Allah ki fine élève moi comme ene imam et combatte moi c’est combatte Li.

Mo espérer ki bannes pages suivants pou ouvert lizié de bannes Ahmadis sincères et ki capave réfléchi pou zot comprend ki zot bannes chefs actuels totalement incompetent pou occupe ene organisation religieuse. Zot bannes desseins machiavéliques et maléfiques zot pou capave mettre li en œuvre ailleurs mais pas dans Jamaat Ahmadiyya. Azordi jour problèmes Jamaat Ahmadiyya c’est pas so bannes ennemis de toujours ki finne habituer créer problèmes pou li. Azordi problèmes Jamaat Ahmadiyya c’est ene déficit de leadership et d’enseignement fondamental de l’Islam à tous les niveaux. Bannes ignorants accapareurs et bannes molvis l’esprit fermé et bannes membres Majlis Amla passifs pe dirige dimoune et alors zot diriger sans connaissance parceki zot limité dans connaissance religieuse. Alors zot mal guidés et zot mal guide les autres. Résultat c’est Jamaat Ahmadiyya actuel.

Mo tenir a remercier mo bannes camarades Dr Mahmood Sooltangos, Zahoor Sooltangos et mo deux frères Siddique et Mobasshir pou zot bannes suggestions valables et aide ki zot fine apporter dans preparation de ça livret là. Mo prier ki Allah donne zot la meilleur des récompenses pou travail ki zot pe faire pou permette nou préserve les vrais enseignements ki Hazrat Masih Maood^{as} fine donne nous. Ameen

Imam Zafrullah Domun

Jamaat Ahmadiyya Al Mouslemeen

Les Guibies, Pailles-Ile Maurice

8 Mars 2011/ 3 Rabi’ous Sani1432.

LA LETTRE EN QUESTION

Bismillah ir rahman ir Rahim

Monsieur Zafrullah

Mo pas ena aucune hésitation ou la honte pour déclarer ouvertement qui mo ene dimoune bien faible, rempli de défauts. A chaque moment mo cherche" Allah So l'aide et So pardon. De la même façon mo croire qui chaque membre du Jamaat Ahmadiyya zot aussi comprend qui zot faible et zot pe cherche Allah So pardon et So l'aide.

Par contre ou finne déclarer qui ou enn dimoune qui gagne (*ilham*) depuis Allah et qui Allah finne appoint ou comme Imam et qui ou tout seul qui enn vrai serviteur du Messie Promis (as). Et d'après ou tout banne dimoune qui pe suivre le Khilafat Ahmadiyya et qui finne prend bai'at avec Khalifatul Massih V, zot et zot Khalifa zot banne egarer. (*naouzo billah*)

Facon plis facile pour conne la vérité

Allah Ta'ala dire dans sura Jumah

"Dire: " O banne Zuifs! Si zot pense ki zot camarades Allah et ki tout banne lé zaute dimoune exclire la-dans, alors souhaite la mort si zot véridique." Saint Coran (62:7)

Hazrat Massih Maoud (as) finne li aussi publie enn doah dans Ruhani Khazaain Volume 13 page 331.

Monsieur Zafrullah, acceptation de doah li le signe de la veracite d'enn dimoune.

Mo faire ou enn requete qui ou aussi mette ou 'case' devant Allah, en forme enn doah et demande Allah pour enn decision.

Mo pe demande ou publier et distribuer ca doah qui suivre la afin qui Allah donne enn decision finale.

"O Allah moi Zafrullah Domun qui proclamer qui Toi To fine envoie moi comme Imaam et To meme finne donne moi ilham.

"Alaysallah be kaafin abdahou, Innallah ma'aka, Innallaha. ma'a ahleka ou bien hasbekallahou wa manit taba'aka menal momeneen."

Traduction de ca banne paroles li comme suit: " Eski Allah pas suffit pou So serviteur! Allah avec Toi; Allah avec to bannes proches; Allah suffit pour toi

et banne qui suivent toi parmi bannes croyants."

Et To même finne envoie moi comme Imam pour banne Ahmadi. Si tout sala fausse, O Allah moi faire doah devant tout le monde et moi dire à tout banne ahmadis et zot Khalifa dire ameen lors moi doah. O Allah qui est Le Maître et Le Créateur des cieux et de la terre. To ena tout pouvoir. Moi présente moi doah devant Toi, qui montré enn signe de Ta part, enn tel signe qui écrase le menteur et aide le veridique et donne victoire au veridique afin qui toi serviteur na pas égaré.

Et celui qui menteur, attrape li avec humiliation. Si moi moi fausse et moi revendication fausse et moi banne ilham li pas pe vine de Toi, alors moi demande Toi pour envoie lors moi beaucoup de maledictions. Et moi demande Toi enn la mort remplie humiliation. Ameen.

O Allah Qui est Le Soutien de banne veridique et Qui détruire banne menteur moi demande Toi pour montrer Toi signe vite. Ameen Thumma Ameen."

Monsieur Zafrullah, au nom de ca Allah veridique la, Qui est Notre Createur et Le Maître de L'univers, publier ca doah la, s'il vous plait, et envoie li dans la caze de banne ahmadis.

Mais moi dire ou d'avance qui JAMAIS ou pas pour faire li. Parce qui ou bien connais qui ou enn menteur et ou banne ilham li PAS vine de Allah Le Rahman; mais Li vine de Shaitaan.

Et si jamais ou ose publier ca, personne pas capave faire ou échapper de la malediction d'Allah.

Rabbih kouw bil haqq. Wa rabbonar Rahmanoul moust'ane ala ma taswifoune
(21: 113)

"Mo Seignere! Zize avec la vérité. Et nou Seignere Li Tout-Misericordié, are Li-Meme ki nous bizin dimande aide conte ca ki zot pe affirmé-la"

De la part de :.....

MO REPONSE

Nou pou commencer par expliquer ki sanne la fine écrire ça lettre là. Pour moi pena auquene doute ki l'idée de ça lettre la, so rédaction et so circulation li vinne de molvi Basharuth Naveed, produit du Jamiah de Rabwah, missionnaire en charge de Jamaat Ahmadiyya de l'île Maurice. Mais li pas pou corek pou dire ki le molvi le seul responsable si ene lettre pareil fine circuler dans le Jamaat à Maurice. C'est le Majlis Amla (Managing Committee) ki roule Jamaat. Alors rien pas capave circuler dans le Jamaat sans l'approbation du Majlis Amla. Alors vrai responsable de la circulation de ça lettre là c'est le Majlis Amla. Et quand nous dire Majlis Amla nous dire amir, missionnaire en charge, bannes les autres missionnaires, Secrétaire, Trésorier et tous bannes les autres secrétaires plus bannes Sadrs Khuddam et Ansars. Zot tous zot partage la responsabilité si ene lettre pareille fine circuler dans le Jamaat. Alors mo réplique adresse tous ça bannes dimounes là en général et chacun en particulier et li adresse aussi bannes ki fine signe zotte nom et fine envoie moi zotte lettre. Alors si lettre fine passe par Majlis Amla, tous bannes membres Amla responsable ki lettre fine circuler. Si lettre pas fine passe par Majlis Amla tous bannes membres Amla responsable kifer ene lettre fine circuler dans le Jamaat sans zot approbation! Alors dans tous les deux situations le Majlis Amla li responsable et coupable ki ene tel lettre fine circuler et fine adresse moi. Et zot bizin assume zot responsabilité !

Avec l'article ki nou ti fer publier dans Weekend vers octobre 2010 la direction du Jamaat à Maurice ti finne subir ene sale coup. Alors ti bizin répliquer. Donc zot fer publier ene l'article ridicule pou essaye noye le poisson. Plus tard quand mo fine expliquer couma zot pe mal mette en pratique les enseignements de l'Islam à travers deux livrets ki mo finne publier et circuler dans le Jamaat, zot nepli capave. Zot bizin fer kikchose pou arrête Zafrullah so l'élan et alors zot produire lettre circulaire. Mais couma bannes vrai capons, bannes *buzdil* zot reste cachiette et zot pas signe auquene lettre pou envoie moi. Zot dire bannes simples Ahmadis alle la guerre contre Zafrullah. Et résultat c'est ki seulement cinq dimounes fine envoie moi ene lettre signé.

Dans Jummah 4 Mars 2011 lamir pe vine dire ou ki si ene sel dimoune ti envoie ça lettre là li ti pou suffit. Mo lance li ene défi pou montrer d'après le Saint Coran ou bannes Hadiths ou bannes écrits de Hazrat Masih Maood^{as} ki ça bannes types de défis là capave lancer par n'importe ki. Seulement dans bannes l'organisation cotte bannes ignorants à la tête ki bannes affaires comme ça faire. Dans bannes organisations religieuses couma Jamaat Ahmadiyya bannes défi pareils envoyés au nom du chef. Si l'amir pas conne l'histoire Jamaat, ki li alle appranne !

Allah fine fer zot plan tombe dan dilo. Par la Grace d'Allah ena beaucoup dimoune pe lire nou Khutbah Jummah couma nou mette li lor net. Et zot conner couma sans auquene crainte mo pe dire bannes affaires lor le Jamaat Ahmadiyya, que ce soit so calife, so amir, so missionnaire en charge et bannes membres de so Amla. Quant à moi, par la Grace d'Allah, mo suivre ceki le Saint Coran dire "**Bannes ki délivrer bannes messages d'Allah, zot peur Li et zot pas peur personne à part Li. Et Allah suffit comme Celui ki garde compte**"(33 :40) Moi mo pas cachiette derrière personne quand mo ena pou dire kikchose ni même mo dire pas publier ceki mo dire. Au contraire mo dire, mo publier et mo signe mo nom. Avec nous c'est la transparence totale. Et c'est le cas avec bannes les autres membres du Jamaat Ahmadiyya Al Mouslemeen.

Mais le magouilleur-né ki à la tête du Jamaat Ahmadiyya à l'île Maurice fine encore ene fois essaye noye le poisson quand, dans so annonce dans so Jummah 4 mars 2011, li fine rode fer croire ki moi-même ou bien mo bannes camarades ki avec moi ena affaire avec bannes lettres anonymes ki pe circuler dans zot Jamaat. Mo prend Allah pou témoin nou bannes dimoune ki essaye cultive crainte d'Allah dans nou le cœur. Nou pas peur auquene humain ou autorité. Quand nou ena pou dire kikchose nou dire et nou publier et nou signe nou noms. Nou pas dimoune ki dire les autres ki pas bien comprend bannes enseignements d'Allah "**alle fer Jihad nou nou pou assise ici pou guette ki pou arriver**" Le Majlis Amla fer circule lettre et fine dire bannes dimoune ki soi-disant calife fine approuve lettre là mais auquene dimoune parmi le Amla sauf ene pas fine gagne courage d'ene vrai musulman-Ahmadiyya pou mette so signature en bas ça lettre là et envoie moi li. Azordi l'amir li pe vine avec ene fatwa pou dire ki ene de dimoune envoyer li suffit. Li dire ça ziste pou cachiette li parski li conne très bien ki li ene capon. Mais couma bannes gros requins

conner ki bizin faire pou pas tombe dans piège ni lamir, ni le missionnaire en charge, ni la majorité de bannes membres du Majlis Amla pas fine oser pou signe ça lettre là. Et zot fine laisse cinq simples tilapias ki croire zot bannes requins envoye moi bannes lettres signés.

Mo ti pe attanne pu gagne ene lettre signer par le calife, Mirza Masroor Ahmad li même, en tant que chef suprême du Jamaat et surtout si zot prétende ki li fine donne so consentement pou circule ça lettre là. Mo fine recevoir lettre signé de la part de Mons Haniff Jowahir, Dr Bashir Jowahir, Mons Muctar Jowahir, Mons Assif Domun et Mons Goolam Atchia. Mo ti pou content trouve bannes les autres ténors du Jamaat zot lettre aussi. Mo ti pou content trouve ene lettre signer par Mons Mubarack Sooltangos, Mons Ahmad Taujoo, Mons Hassen Ramjaun, Mons Muctar Din Taujoo, Mons Sadullah Bhunnoo, bannes Mohuns, bannes Joolfoo de Curepipe ki retourne mo bannes livrets, Mons Ganee Jhangeerkhan de Londres et tout bannes ki coze contre moi derrière mo le dos. Mais dans ene population Ahmadiyya de 3000 dimounes ziska ler cinq seulement fine montrer zot courage et zot fine envoye moi zot bannes lettres. Alors ça fer nou comprend ki campagne envoye lettre fine vine ene fiasco totale. Quand l'amir fine comprend ça li annoncer ki pou zot, z'affaire fine fini.

Quand calife dire fer boycott majorité bannes Ahmadis fine rivalise avec zot camarades pou exécute calife so bannes instructions. Quand calife donne approval pou envoye lettre-circulaire mobahila unidirectionnel selment cinq Ahmadis reponne l'appel et le mollah-mufti amir Jamaat émette so fatwa ki ene seul suffit. Cotte ça bannes Ahmadis ki ena bon sens ki pas pe capave fer zot 'chef spirituel' comprend ki l'étendue du mal ki li fine fer Jamaat Ahmadiyya Maurice. Arrête dire c'est moi ki fine créer li! Eski zot pe attanne justice de la part du Calife? Décision ene grand dilemme! Met li dehors pou ene défaite! Garde li aussi ene problème! Pendant ki pas pe capave décider, li reste en place! Mo appranne ki dans l'Afrique quand Jamaat fine trouver ki ene so bannes dimounes dignes de confiance fine fane ene grand coup zot garde li en place pendant ene certain moment. Ensuite zot fer li aller en douceur et zot même donne li ene réception d'adieu. Attanne nou guetter dans Maurice ki pou ena.

Mais couma mo fine dire à plusieurs reprises bannes dirigeants Ahmadiyya conne blaguer beaucoup mais zot pas conne passe à l'action. Pou zot, verset

Coran ki dire "*Yaa ayyohal lazina aamanou lema taqoulouna maa laa taf'aloune*" li appliquer cent pour cent. Ca verset là veut dire "O bannes dimounes ki fine amène iman ki faire ou dire bannes kikchoses ki ou pas faire." C'est ceki zot fine faire. Bannes chefs dans Jamaat dire bannes dimounes faire ene kikchose mais zot, zot cachiette et pas faire nanrien. Ki Allah dire pou bannes dimounes coumsa : "*Kabora maqtan indallahé an taqoulouna maa laa taf'aloune* " ki veut dire "Allah bien pas content ki zot dire bannes kikchose ki zot pas faire". Alors pose ou la question couma bannes chefs actuels du Jamaat capave gagne victoire dan kik domaine quand Allah pas content ceki zot pé faire.

Vers la fin de l'année dernière ou au début de ça l'année là mo finne trouver dans en rêve ki bannes dans Jamaat Ahmadiyya pe faire bannes grands démarches pou faire quelque chose contre moi. Mais tout de suite Allah dire moi "*Wallahokhayroul maakereen*" ki veut dire "Mais Allah li meilleur de bannes ki faire plans". Ça révélation là li faire moi comprendre tout de suite ki n'importe ki mo bannes adversaires faire mo pena pou tracasser du tout parski mo Maitre Li le meilleur de bannes ki faire plan. Alors quand mo fine prend connaissance de ça lettre circulaire là dans l'après midi Allah dire moi "*Wa antal aa'laa*" c'est-à-dire "c'est toi ki pou gagne le dessus". Alors **le Majlis Amla Mauricien et bannes** dans Tabshir capave essaye faire tout ceki zot ouler mais à la fin zot pou gagne défaite parski Allah finne dire so humble serviteur "*Fatah-o-Zafar ki Kaaleed Toumare hathons mein thama gaya hai* " ki veut dire "la clé du succès et de la victoire fine place dans to la main". Et c'est pas fini. Ena quelque temps de cela Allah fine révèle moi message suivant "*Teri aawaaz èy doushmané badnawa do qadam dour do tin pal jaaégi*". Traduction de ça phrase la li comme suit "to la voix o toi ennemi ki ena ene mauvais la voix li pas pou alle pli loin ki ene ou deux pas". Dans ene fraction de seconde mo fine demande moi ki faire Allah pé dire moi ça. Alors Allah fine faire moi comprendre ki li ena affaire avec ça lettre circulaire là. Très peu dimounes dans Jamaat pou reponne à ça l'appel ki vinne de ça bannes ennemis ki pé faire ene mauvais l'appel là. Et ce n'est pas tout. Allah fine aussi dire moi à propos de bannes ki travail pou fer moi du tort "*Tere makron se ey jahil mera nouksan nahin hargiz ke ye jaan aag mein par kar bhi salamat aane wali hai*". Ca phrase là veut dire "To bannes machinations/magouilles pas pou faire moi auquene du tort parceki même si passe moi dans difé mo pou en sécurité."

Alors mo espérer ki bannes membres du Majlis Amla pou prend zot responsabilités et zot pas laisse zot guider par bannes ki mal guidés !

Alors pour nous clore ça chapitre là nou pou dire ki la direction du Jamaat fine lance ene Jihad et zot fine fer ene appel avec bannes Ahmadis pou écrire moi ene lettre. Mo appranne ki dans certains mosquées ça lettre là li affiché. Quand ene Ahmadi pou trouve ça lettre là li pou penser ki direction Jamaat fine casse ene grand paquet. Et c'est comme ça même ki pe presente ça. Mais c'est ki zot pas conner c'est ki ni molvi, ni amir ni bannes membres de Majlis Amla pas fine oser signe ça lettre la et envoie moi li. Bannes dirigeants Jamaat envie fer bannes Ahmadis croire ki zot fine frappe Zafrullah Domun et so groupe ene bon coup. Mais la vérité c'est ki zot pétard fine fizette ar zot même. Zot fine gagne selment 5 dimounes pou fer zot jihad pendant ki zot assise dans laçage. La plupart bannes dimounes dans Jamaat capave attribuer à moi plusieurs défauts mais zot conner ki mo pas ene menteur. Alors zot pas fine signe Majlis Amla so lettre. Zot fine préfère laisse li décoire Notice Board dans bannes mosquées ou bien cachiette li dans ene file. Et zot pas fine suivre zot bannes chefs lor ça simin suicidaire cotte bannes là ti ouler amène zot. Ça c'est ene bon signe. Zot fine commence servi zot l'esprit ki Allah fine donne zot. C'est toujours ene pas dans la bonne direction.

POSITION ENE AHMADI KI SUIVE CALIFE

Aster nou analyse contenu de ça lettre là pou fer ou comprend ki kantité bannes ki fine approuve contenu de ça lettre là pas conne bannes enseignements de Hazrat Masih Maood^{as}. Lettre la commencer par dire ki celui ki fine écrire li pe avouer ki li ene pécheur et li demande pardon avec Allah. Pena nanrien extraordinaire ki ene Ahmadi senti li faible et pécheur et ki li dimanne Allah pou pardonne li. Mo penser si vraiment bannes Ahmadis ti comme sa zot ti pou bannes plis bons dimounes dans le monde. Parski ene fois zot fine prend conscience de zot bannes faiblesses zot ti pou faire tout pou corrige ça bannes faiblesses la. Zot ti pou dimanne Allah pou pardonne bannes péchés ki zot fine déjà faire et zot ti pou faire efforts pou arrête faire ça bannes péchés là dans l'avenir. Mais ki nous fine trouver dans Maurice et ailleurs. Ahmadi fine commette *Shirk* lor *Shirk*. Zot fine donne le khilafat (zot prop version) plisse l'importance ki Allah. Zot fine préfère obeir zot calife et désobéir Allah. Zot fine vinne bannes ki pratique ene boycott non islamique contre zot bannes

propres frères et sœurs. C'est pourquoi zot pena aucune hésitation ou la honte pou avouer zot bannes péchés ki zot fine pratiquer pendant les onze dernières années. Et tout ça la fine faire selon les instructions ki zot calife fine donne zot et appliquer avec zèle et ferveur par amir, molvi et bannes membres du Amla.

Li vrai ki mo fine déclarer ki mo recevoir bannes revelations de la part d'Allah et ki Allah fine élève moi comme ene Imam principalement pou bannes Ahmadis mais surtout pou bannes ki ena frateur Allah dans zot le cœur (bannes *muttaqis*). Mo aussi dire ki d'après le Saint Coran et d'après bannes écrits de Hazrat Masih Maood^{as} **Allah pou continuer nomme bannes dimounes pou faire travaille de reforme dans le monde ou dans ene Jamaat jusqu'au jour du Jugement dernier**. Mo finne déjà explique ça ailleurs et mo pas trouve aucune nécessité pou répète ça bannes extraits là ici. Ene deux bannes revelations ki Allah fine donne moi lor sujet mo imamat zot comme suit :

- *Inni Jaaeloka linnaasé imama*

Mo pou faire toi vine ene Imam pou bannes dimounes.

- *Ja'alani Rabbi Imamal muttaqeen*

Allah fine faire moi vinne ene Imam pou bannes *Muttaqis*.

- *Yaa qutoub uddin unzur ila Jamaa'ati- unzur ila aasaaré rahmate rabbeka alayka*

O Toi Pole de la Religion guette Mo Jamaat- Guette bannes signes de Miséricorde de To Seigneur lor toi.

Pour l'instant mo cite seulement ça trois revelations là. Mo pas nier du tout ki ceki nou comprend par *Ilham* dans Jamaat Ahmadiyya Allah fine fer So Faveur lor moi et Li fine donne moi plusieurs de bannes *ilham*. Si Allah fine faire ça c'est par So Grace et non pas par mo mérite. Li Le Grand Donateur et Li donne a ki Li envie couma Li envie sans ki Li soucier Li de ceki bannes les autres dimounes ena pou dire. Et surtout li pas bizin prend permission avec le Majlis Amla Ahmadiyya pou Li manifester So Grace lor dimoune ki Li ouler.

Mais autant ki mo capave rappel JAMAIS mo finne dire ki mo "**tout seul qui enn vrai serviteur du Messie Promis**"^{as} couma pe faire croire dans lettre circulaire. Si ene dimoune capave produire ene document cotte mo finne faire

ene déclaration pareille mo pou remercier li et mo pou corrige ça déclaration là. Dans lettre pas fine donne aucune référence cotte mo fine faire ça déclaration là. Alors mo dire ki bannes membres du Amla surtout l'amir et le missionnaire en charge fine faire ene accusation bien grave lor moi. Et mo espérer ki le molvi pou rappelle zot ki Allah dire dans le Saint Coran pou bannes ki mette fausses accusations lor zot bannes camarades.

Oui, li vrai ki d'après moi, banne ki pe suivre le cinquième calife et le khilafat Ahmadiyya tel ki li fine instituer, zot égaré, c'est-à-dire zot fine éloigne zot de bannes enseignements du Saint Coran et de bannes enseignements ki Hazrat Masih Maood^{as} fine donne nous. Plusieurs fois mo fine dire ça et mo pou continuer dire li aussi longtemps ki zot pas revinne lor le chemin tracé par Allah. Au lieu ki dire "*na'ouzobillah*" lor ceki mo fine dire, zot ti bizin dire ça parole là avec sincérité avant ki le Majlis Amla avec l'actuel amir à la tête ti éloigne le Jamaat du Saint Coran et de bannes enseignements du Hazrat Mirza Ghulam Ahmad^{as}.

D'APRES HAZRAT MASIH MAOOD COUMA POU CONNE LA VERITE

Dans la suite de la lettre zot mette en avant ene déclaration. Zot dire en d'autres mots ki façon plis facile pou conne la vérité c'est ki mo invite la mort lor moi-même. Et pour ça zot fine cite ene verset du Saint Coran concernant bannes Juifs. Mo fine fecque expliquer ki JAMAIS mo fine dire ki mo tout sel ene vrai Serviteur du Messie Promis couma bannes Juifs ti pé dire ou bien ki zot dire même zordi aussi ki c'est **zot tout seul ki Allah content**. Mais ce n'est pas ça ki mo pé dire. Ceki mo pe dire li comme suit:

1. Allah donne moi par So Grace des revelations (*ilham*)
2. D'après Hazrat Masih Maood^{as} la porte de la révélation li pou reste ouvert ziska Qiyamat.
3. Khilafat Ahmadiyya dans façon ki le second calife fine établir li depi 1956 jamais li pou capave accepter ene dimoune dans Jamaat Ahmadiyya ki dire ki Allah fine envoye li pou reforme le Jamaat ou bien pou corrige so bannes erreurs.

4. Sa Khilafat Ahmadiyya la penser ki so système capave faire reforme ki bizin dans le Jamaat. Mais Hazrat Masih Maood^{1^{as}} fine dire nou ki Jamaat tombe dans vieillesse pareil couma dimounes et c'est Allah ki assure li de préservation de l'enseignement donné.
5. Ene calife pas capave accepter ene dimoune ki dire ki li vine de coté Allah parski calife la fer ene serment ki li pou préserve le system du khilafat. Et si li accepter dimoune là li pou casse so serment. Alors pou préserve so serment li ignore ene dimoune ki Allah pe envoyer et ki, aidé de *ruh-ul-quddous*, pli habileté pou faire sa travail la. Pou l'ego du calife ene kikchose comme ça li trop impensable.
6. Jamaat Ahmadiyya finne adopter certaines pratiques non islamiques tel que boycott de bannes Ahmadis et pas fer salaam. Tout ça bizin arrêter immédiatement.
7. La façon ki pe gère l'argent dans le Jamaat li pas corek. Pena assez de transparence et beaucoup d'argent gaspillé.
8. Le Jamaat Ahmadiyya bizin cultive ene ouverture d'esprit et appranne accepter banne point de vues différentes. Bizin arrête mette dimounes à tort et a travers en dehors du Jamaat.
9. Nou bannes missionnaires bizin développe ene l'esprit critique et zot pas bizin cantonne zot a seulement ceki zot finne appranne dans Jamiyah Ahmadiyya. Bizin revoir zot programme d'étude et élargi li.
10. Dans le Jamaat bizin ena ene groupe de bannes dimounes ki pou faire bannes recherches et zot bizin mette zot au courant de tout bannes l'étude ki pe faire dans l'ouest ou ailleurs à propos de l'Islam.

Alors ceki mo pe dire zot pas fine cause lor la du tout et ceki mo pas fine dire zot cause li. Ene fois de plus ça montrer zot bannes préjugés et façon zot fonctionner. De plus mo pe trouver ki zot pe ressembler bannes anti-Ahmadis dans zot pensée et zot comportement.

Aster laisse mo explique encore ene fois cotte zot mélange bannes affaires. Bannes Juifs ti dire ki Allah content zot exclusivement. D'après zot mo finne dire ki mo tout seul ene vrai serviteur du Messie Promis. Supposons ki mo fine dire ça quoique mo fine déjà déclarer en haut ki mo pas fine dire ça. Alors ki

similarité ena dans ça deux déclarations là. Juifs ti pe cause lor Allah et moi supposément mo fine cause lor le Messie Promis. Donc verset ki zot fine citer pas appliquer du tout. Encore ene fois zot fine induire en erreur bannes pauvres Ahmadis ki fine suive zot. Dans zot aveuglement et zot enimité et zot bannes préjugés zot fine applique ene verset du Saint Coran cotte li pas appliqué. C'est pourquoi mo dire ki bizin refaire zot l'éducation. Ceki pe appranne dan Jamiah de Rabwah et pe repenne dans le monde nepli suffit pou cope avec bannes nouveaux défis avec le quel Jamaat pe fer face.

De plus ça bannes Juifs là c'est bannes dimounes ki refuse accepter le prophète Mohammad^{saw} alors Allah fine adresse zot dans ça verset là. Allah pas fine dire le Prophète invite la mort lor li parski li pe dire ki li vine de coté Allah. Le Prophète pe adresse bannes ki croire ki zot bannes préférés d'Allah. C'est pou zot ki pe dire invite la mort lor zot si zot vrais. Rappelle bien ki majorité Ahmadi dans Maurice et ailleurs croire ki zot ena passeport pou rentre dans Paradis parski zot ena khilafat. Alors c'est zot bannes Ahmadis khilafat walas ki montrer ça l'attitude de bannes Juifs ki fine mentionner dans ça verset là. Puisque d'après zot et zot calife mo ene menteur et zot bannes véridiques c'est zot ki bizin invite la mort lor zot parceki c'est zot ki pe montrer bannes kalités de bannes Juifs en rejetant bannes dimounes ki vinne de coté Allah.

Mo pas étonner par ceki zot pe dire parski selon moi zot ignore ceki Hazrat Masih Maood^{as} fine dire et zot pe développe zot propre bannes enseignements ki zot envie fer bannes Ahmadis croire. Alors laisse mo expliquer en bref ki Hazrat Masih Maood^{as} fine dire lor ça sujet là.

Hazrat Masih Maood^{as} fine donne nous dans plusieurs endroits dans so bannes écrits plusieurs bannes critères pou examine véracité de déclaration ene prétendant à la révélation ou bien ene quelqu'un ki dire ki li ena ene mission de la part d'Allah. Li fine explique nous ki d'après le Saint Coran nous bizin guette la vie de ça dimoune ki fer claim là avant so claim. Ki ti réputation ça dimoune là dans la société? Eski li ti ene menteur ou bien ene dimoune ki cause vrai? Li donne ene l'autre critère ki trouve dans verset suivant:

Et ene croyant parmi bannes dimounes de Pharaon ki ti cachiette so la foi fine dire :*eski zot pou touye ene dimoune parski li dire "Allah mo Seigneur" et li fine apporte ou bannes preuves claires de la part de so Seigneur? Si li ene*

menteur, péché de mensonge pou tombe lor li; mais si li pe cause vrai alors certains de bannes kikchose ki li menace ou pou tombe lor ou. Définitivement Allah pas guide ene transgresseur menteur. (40:29)

Ene l'autre place encore Hazrat Masih Maood^{as} fine donne plusieurs caractéristiques d'ene bon croyant et li dire bannes dimounes vine challenge li lor ça bannes critères la. De plus dans le Saint Coran Allah explique nou couma bizin presente le message aux autres. Li dire : *Appel vers le chemin de to Seigneur avec sagesse, bon conseils et discute avec zot dans la meilleur façon.*"(16 :126). Mais la direction Ahmadiyya dirigé par le calife et le Majlis Amla pas intéresser du tout avec ceki le Saint Coran dire. Zot pli intéresser pou mette zot agenda de haine en pratique. A plusieurs reprise mo fine invite zot pou ene dialogue mais jamais zot fine disposer pou faire li. Et pourtant Hazrat Masih Maood^{as} dire nous:

"Ene dimoune bizin deux choses pour ki li capave conne la vérité. Premièrement li bizin ena bon sens ki Allah fine donne li et l'intelligence nécessaire. Deuxièmement li bizin ena ene compréhension ki vine de la part d'Allah et li bizin ena ene bonne disposition. Et bannes dimounes ki pena auquene affinité avec ça bannes affaires là zot développe dans zot le cœur seulement dégout et objections et c'est la raison pourquoi bannes dimounes dans le passée fine rejette bannes dimounes véridiques." (**Colonne 1, para 2, Page 50 Review of Religion April 1997**)

Sans bannes qualités pareils personne pas pou capave conne la vérité. Alors ou bizin développe la disposition nécessaire pou essaye comprendre la vérité dans ou. Si ou continuer dire nou papa ti dire nou croire dans khilafat et ou pas même comprend de ki khilafat nou pe causer alors ou pas pe comprend nanrien. Apres si dire ou ki, khilafat ki nou fine comprend li pas exacte, si ou content la vérité et ou envie comprendre la vérité ou bizin pose ou même certaines questions. Ou pas continuer dire bizin fini Zafrullah et so bannes dimounes parski zot ena bannes idées pareils. D'après Hazrat Masih Maood^{as} ceki ou fine fer ziska ler li pas bon du tout. A cause ça même ou loin avec ça vérité ki Allah fine donne nous. Zot pas ouler dialoguer et pourtant Hazrat Masih Maood^{as} dire nous "Sans ene conversation cotte ena bannes points de vues opposants pas capave démontrer la vérité " (**Page 50 Review of Religion April 1997**)

A cause ça même ki mo dire ki la direction du Jamaat fine abandonne bannes enseignements de Hazrat Masih Maood^{as} et zot laisse zot mal guider par bannes mollah tel ki l'amir actuel et le molvi Basharuth Naveed. Et ceki pli dommage c'est ki pas fine ena ene dimoune droite (*rashid*) pou dire ça bannes mollahs là ki zot pe mal faire! Et ou étonner ki bannes mollahs anti-ahmadis touye bannes Ahmadis dans Pakistan ! Guette ça deux ki à la tête là et ou pou comprend couma bannes les autres là fonctionner.

Alors si zot penser ki peut-être mo pe gagne peur et mo pe rode sauver, laisse mo rappel zot encore ene fois ki depi ki crainte d'Allah fine rentre dans mo le cœur mo pas peur personne, ni mollah, ni calife encore moins amir et missionnaire en charge. Alors mo pas du tout disposer pou mo alle dire Allah élimine cinq simple membres ki fine tombe dans la trappe ki le Majlis Amla fine mettre tandis ki zot finne cachiette et zot fine sauver et zot pas fine signe lettre ki zot dire les autres signer.

Alors mo fine amplement prouver ki la méthode préconiser ce n'est pas la méthode ki Hazrat Masih Maood^{as} fine enseigne nous. Et donc moi mo pas disposer pou abandonne les enseignements du Messie et adopter enseignement d'ene Majlis Amla ki endoctrine et incite ban musulmans commet ban actes suicidaires. Mo pas capave rejette les enseignements du Prince de la paix pou adopter enseignements de bannes mollahs instigateur de la haine dans la société. C'est pas ça l'Islam là ki mo fine appranne pou pratiquer.

MO FER ZOT ENE PROPOSITION

A nou montrer bannes dimounes ki nou capave pas d'accord mais nou capave maintenir ene dialogue (pas ene *bahass*). Mo proposer ki étant donné zot pas ouler joinne moi pou causer, a nous cause à travers YouTube. Trois dimounes de nous cotés et trois dimounes de zot coté établir ene agenda. Ensuite nou pou cause lor bannes points de ça l'agenda là ene par ene lor YouTube. Chaque intervention pou dure seulement cinq minutes et chacun pou proposer et réfute points de so camarade et laisse tous bannes Ahmadis guetter dans zot la caze. Et bien sur pou ena beaucoup d'interventions de cinq minutes de deux cotés. Moi mo pou cause de nou coté et de ou coté soi le amir (actuel ou futur) ou bien le missionnaire en charge pou causer. Mo pas pou accepter personne d'autre. Et zot bizin dire ki zot pe cause au nom de Jamaat Ahmadiyya majoritaire. Quand

nou fine causer et explique nou point de vue c'est moi ki pou décider si bizin lance zot challenge ou bien non. Ler la nou va guetter. Accepter ca parski ça c'est la méthode de Hazrat Masih Maood^{as}.

ESKI HAZRAT MASIH FINE FER ENE DO'A PAREIL?

Mo fine déjà prouver en haut ki ceki zot fine dire à propos de bannes Juifs li applique pou zot et zot Jamaat pas pour moi. Aster nou pou coze lor acceptation de prière. Zot fine aussi mentionner ki Hazrat Masih Maood^{as} aussi ti fer ene do'a pareil. Avant ki nou guette ene coup ça référence ki zot fine mentionner là mo pou cite ene extrait de ceki Hazrat Masih Maood^{as} dire ene tipé avant dans ça livre la.

Hazrat Masih Maood^{as} dire:

Plusieurs fois mo fine dire zot vini et causer pou enlève zot bannes doutes, mais personne pas fine vini. Mo fine appelle zot tout pou vine de l'avant pou faire decision mais personne pas fine vini. Mo fine dire zot ki zot lire *namaz istikhara* pourki Allah éclaire zot avec la vérité, mais personne pas fine fer nanrien. Mais zot pas fine arrête rejette moi. Ceki Allah fine dire lor moi li vrai :"**Ene avertisseur fine vine dans le monde, mais le monde pas fine accepter li, mais Allah pou accepter li et Allah pou établir so véracité par bannes attaques très puissantes.**" Eski li possible ki ene dimoune li vrai et li arriver ki li perdi? Eski li possible ki ene dimoune vine de coté Allah et Allah détruire li? Donc O bannes dimoune pas la guerre avec Allah. Ça c'est ene travail ki Allah fine fer pou zot et zot la foi. Alors pas créer difficulté dans so chemin. Zot capave ena capacité pou diboute devant zeclair mais devant Allah zot pena auquene capacité. Si ça affaire là li ti ene initiative d'ene dimoune pas ti nécessaire de zot pou fini li. Allah suffit pou élimine li complètement. (*Rohani Khazain* Vol 13 page 331).

Voilà ki mo fine trouver dans ça page ki fine mentionner là.

Aster a propos de do'a ki zot dire ki Hazrat Masih Maood^{as} fine fer, nou bizin comprend ki ti passer avant ça. Ene dimoune **anonyme** fine fer ene déclaration dan ene journal ki ti appelle *Chawdawi Sadi* en date de 15 Juin 1897. Li fine cause ene causer bien vilain pou Hazrat Masih Maood^{as}. Quand Hazrat Masih

Maood^{as} fine tanne ça, **li fine senti** ki li bizin envoye malediction lor ça dimoune là pou bannes causer ki li fine dire mais li fine fer grand efforts pou pas dire nanrien. Li fine essaye pou tire ça l'envie de fer *bad do'a* depi so l'âme. Mais li pas fine réussi et alors li fine comprend ki ça sentiment pou fer *bad do'a* là li pe vine d'Allah et alors li fine fer *do'a*. Bannes paroles de ça *do'a* la li comme suit :

"O Allah si To conner ki mo ene menteur et ki c'est pas Toi ki fine envoye moi couma bannes dimoune pe dire et ki mo maudit et rejeté et menteur et ki mo pena auquene relation avec Toi et Toi to pena auquene relation avec moi, alors mo supplier Toi en toute humilité ki To détruire moi. Et si To conner ki mo vine de Toi et c'est Toi ki fine envoye moi et ki mo le Messie Promis alors mo demande Toi ki to enlève le voile ki lor ça *buzrug* là ki fine écrire dans ça journal là. Mais si li vine dans Qadian et devant ene l'assemblée li presente so excuse alors mo demande Toi ki to pardonne li parski To Miséricordieux et Généreux."(*Rohani Khazain* Vol 13 page 332)

Ensuite Hazrat Masih Maood^{as} dire ki dans un an (du **1.7.1897 au 1.7.1898**) l'effet de ça *do'a* là pou manifester.

Mais zot pas fine raconte tout ça. Dans mo cas mo penser ki le *buzrug* c'est le molvi li même parski li fine reste dans l'anonymat et li fine fer circule ene lettre contre moi avec l'approbation du Majlis Amla. Mais ziska ler Allah pas fine donne moi ça état pou fer ça *do'a* ki Hazrat Masih Maood^{as} ti fer pou so adversaire. La situation entre ceki pe passer azordi et ceki ti passer dans l'époque de Hazrat Masih Maood^{as} li pas pareil du tout. Ici nou ena affaire avec nou bannes frères et sœurs Ahmadiyya. Zot bannes suivants aveugles du khilafat, zot pas conner ki Hazrat Masih Maood^{as} fine dire exactement. Alors li nou devoir pou essaye fer ene travail d'éducation pou fer ça bannes dimoune là conner ki nou enseignement été. C'est pourquoi nou fine toujours privilégier le dialogue au lieu de la guerre ou bien la malediction. Nous penser si ena dialogue, pas *bahass*, nou pou capave explique et fer comprend ki nou message été. Mais bannes ki détenir le pouvoir envie garde zot mainmise lor l'esprit de bannes ahmadis et zot pas ouler aucune dialogue parski zot conner ki zot pena arguments. Alors proposition ki mo fine fer pou aide tout dimoune pou capave fer li ene idée de la vérité.

De toute façon contexte dans lequel Hazrat Masih Maood^{as} ti fer ça kalité do'a la et nou contexte li pas pareil. Alors zot essaye décevoir so bannes dimounes quand zot dire ki Hazrat Masih Maood^{as} aussi ti fer ene do'a similaire. La seul chose ki similaire c'est ki ti ena ene dimoune ki ti dans l'**anonymat** et li ti dire du mal pou Hazrat Masih Maood^{as}. Alors Hazrat Masih Maood^{as} ti fer do'a ki ça dimoune là so identité vine connu. En ceki concerne-moi, le *buzrug* (mot trop fort) en question mo conne li très bien. Alors pena auquene nécessité pou moi ki mo fer ça do'a ki Hazrat Masih Maood^{as} fine fer. Ici pas fine bizin attanne un an. Couma mo fine lire lettre mo fine conner ki sanne so la main derrière ça lettre là. Mais malgré ça le Majlis Amla aussi coupable ki fine circule ça lettre là.

DO'A KI FINE DIMANNE MOI POU FAIRE

Moi mo déclarer ki mo vine de coté Allah et c'est pas ene calife ki fine nomme moi. Mo aussi dire ki Allah fine donne moi plusieurs revelations au cours de mo la vie. Mo aussi dire ki Allah fine enseigne moi plusieurs do'a. Et aster ou penser ki quand pou bizin fer do'a pou fer éclate la vérité mo pou suivre do'a préconiser par bannes membres du Jamaat Ahmadiyya ki fine rejette moi? Eski ou fine trouve ene kikchose plis ridicule ki ça? Dans zot enimité et zot aveuglement zot cause bannes causer insensés. Mo considérer ki le calife et so Jamaat fine egarer et aster mo pou vinne demande zot pou dire *ameen* quand mo pe fer do'a ! Moi mo fer do'a dans bannes mots ki mo choisir et ki Allah fine enseigne nous. Mo pas bizin l'aide de bannes Ahmadiyya égarés pou vine enseigne moi couma mo bizin adresse Allah. Nous adresse Allah dans mots ki nous choisir et nou pas accepter dictée de personne. Et a la fin de ça livret là mo pou donne ou ene de do'a ki mo pou fer avec Allah.

De plus mo ti pou content si le Majlis Amla prend l'aide de molvi Basharith Naveed ki vine depi Jamiah Ahmadiyya de Rabwah et zot cite ene verset du Saint Coran cotte Allah fine dire à ene dimoune ki dire ki Allah fine envoye li avec ene mission, pou invite malediction d'Allah lor li même. Allah dire ça dimoune là "Mo envoye toi comme ene miséricorde pour toute l'humanité" et ou envie ki dimoune là li invite la mort lor li. A cause ça même mo dire ki l'éducation bannes molvi bizin refaire parski zot pe mal fer l'éducation de bannes Ahmadis, y compris membres du Amla. Zot pe trop ressembler bannes

mollahs ki pena auquene connaissance de la religion et ki cozer seulement pou embête bannes pauvres Ahmadis innocents.

Zot conne très bien ki jamais bannes do'a pareil pas fer selment par ene sel coté dans ene dispute. Encore ene fois alle relire "*Essence of Islam Volume 3*" et zot pou trouver couma Hazrat Masih fine expliquer quand bizin fer ça bannes kalité de do'a là. Tous les deux partis bizin prend engagement. Mais zot ki zot finne fer. Zot fine exploite l'ignorance et la haine ki 5 dimounes ena pou moi pou fer zot signe zot lettre ridicule alors ki zot cachiette zot pou guette tamassa. Eski zot fine fer ene engagement de zot part ki zot pou accepter moi si mo pas fine détruit dans ene certaine temps? D'ailleurs combien le temps zot fine mettre pou ça défi ki zot fine lancer a travers les autres dimounes la? Mo comprend ki zot pena auquene sens de justice dans zot et peut-être ça mot la pena auquene sens pou zot. Mais si zot ti ena ene tigitte taqwa dan zot le cœur et si zot fine bien appranne ceki Hazrat Masih Maood^{as} fine dire, zot pas ti pou essaye embête bannes Ahmadis avec bannes conneries ki zot fine écrire.

D'ailleurs laisse mo rappelle zot si ene dimoune li fausse et li pe dire ki Allah pe donne li bannes revelations et li pe attribuer a Allah bannes affaires ki Allah pas fine dire li, Allah li même pou detruire ça dimoune là ki li faire do'a ou bien non. Allah dire dans le Saint Coran:

**Et si li ti fabrique et attribuer bannes paroles a nous,
Definitement Nous ti pou attrape li par so la main droite
Et Nous ti pou coupe so la veine jugulaire
Et personne pas ti pou capave protège li contre nous." (69 :45-48)**

Alors quand ene dimoune fer ene déclaration li pe prend ene grand risque. Li conner si li pe attribuer a Allah bannes paroles ki Allah pas fine dire li, Allah pou punir li. Ene dimoune capave aussi bête ki juste pou embête les autres et gagne ene certaine l'importance dans la société li pou risquer ki Allah coupe so licou ? Zot bizin réfléchi un peu. Zot croire ki mo pou risquer 47 ans fidélité a Jamaat Ahmadiyya pou la gloire de quelques jours. Jamais. Mais si Allah fine dire moi "**diboute et avertir**" ou bien "**Nou fine envoye toi comme ene avertisseur et ene porteur de bonnes nouvelles**" zot croire ki mo pou soucier moi ki calife et so bannes dimounes pe dire. Allah so paroles pli important. Si

calife conner vraiment ki Allah fine dire dan le Saint Coran li ti pou suivre ceki le Saint Coran dire. Par la Grace d'Allah moi et bannes ki avec moi nou formé par l'enseignement de Hazrat Masih Maood^{as} et pas par l'enseignement de bannes molvis et nou pas peur pou lance défi quand bizin et nou pas faire nanrien en catimini, cachiette cachiette, parski nou conscient ki Allah pe guette nou et pe observe nous. C'est à Li ki nous ranne compte et pas à bannes individuelles ki mette ene système (zot version de khilafat) en place et zot donne li plis l'importance ki Allah!

ACCUSATION DE MENSONGE

Le molvi Basharuth Naveed pas conne moi. Jamais mo finne ena kik transaction avec li. Mais la majorité membre du Majlis Amla conne moi. Mais zot fine oser dire moi ki mo ene mentere à travers lettre circulaire ki zotte fine approuver. C'était zot responsabilité ! Et zot fine base zot seulement lor le fait ki mo pe dire ki mo recevoir revelations. Pour zot quand ene dimoune dans Jamaat Ahmadiyya dire ça, li pe dire ene gros mensonge. Mais mo pas étonner quand zot dire ça parski mo fine déjà dire ki zot et bannes ki suivre zot bannes ignorants de la pire espèce. Le calife pas arrête répéter ki Hazrat Masih Maood^{as} li le Imam du millénaire et de l'époque. Mais eski bannes membres Amla conner ki zot Imam fine dire? Eski zot conner ki Allah fine dire dans le Saint Coran? Non. Zot exploite l'ignorance de bannes Ahmadis ki plis ignorants ki zot et zot nier la nécessité de la révélation. Eski le molvi et bannes les autres membres du Amla fine déjà prend la peine pou lire ene ti peu le livre du Messie *Haqiqatoul Wahi*? Eski zot fine déjà prend la peine pou lire *Buraheen Ahmadiyya* ? Non, tous ca zot pas conner. Récemment zot propre calife fine faire ene discours lor révélation dans Jalsa Salana de Londres et mo fine traduire ça discours là en Anglais lor nous site pou ki bannes ki vivre dans noir capave trouve clair. Alors ou capave dire ki ou fine reconnaître ou Imam Hazrat Masih Maood^{as} mais en fait ou ene ignorant (*jahil*). Le hadice dire ki "**celui ki pas reconnaître Imam de so l'époque li mort ene mort d'ignorant**". Pena pou donne auquene référence, nou d'accord lor ça hadice là.

Ou capave dire ki ou reconnaître Hazrat Masih Maood^{as} parski ou ene membre dans so Jamaat. Mais eski c'est ça la reconnaissance? Eski ou fine prend la peine pou ou lire 5eme Volume de *Buraheen Ahmadiyya* pou ou comprend ki

ou bizin fer et comment ou bizin fer pou ou vine ça Ahmadi ki Hazrat Masih Maood^{as} ti ouler ki ou vini? Non, tout ça c'est banne travail ki dimanne bannes efforts intellectuels et cotte zot pou alle fatigue zot avec ça. Même si zot fine lire ça bannes livres ki mo pe mentionner là, li paraitre d'après zot façon raisonner ki zot pas conne du tout ki le Messie Promis Hazrat Ahmad^{as} fine essaye fer dimoune comprend. Alors ou fine ignore complètement les enseignements du Messie Promis et ou essaye impose ene l'autre enseignement lor bannes membres innocents du Jamaat. Couma bannes juifs zot bizin zot veau et zot gagne difficulté avec le *tauhid* pure. Alors zot veau c'est le khilafat selon zot et zot bannes guru zot penser mais pas d'après ceki Allah et so Messie fine dire. Ou ene membre dans le Jamaat du Messie mais ou ignore complètement so bannes enseignements. Membres du Majlis Amla bizin jouer rôle d'enseignant dans le Jamaat. Alors au lieu zot élimine l'ignorance zot fine vine bannes agents ki repanne l'ignorance dans le Jamaat Ahmadiyya. Et discours molvi nous conne ça trop bien. Zot fer nous rappelle ceki le poète Pakistanais Habib Jalib fine dire

*Bahut mein ne suni hai aap ki taqreer Maulana
Magar badli nahin ab tak meri taqdeer Maulana*

Traduction :

Mo fine tanne beaucoup de to bannes discours O Maulana
Mais mo destin pas fine changer du tout O Maulana.

Si bannes Ahmadi continuer écoute bannes molvi zot discours pas pou ena auquene changement dans zot comportement dans des siècles et des siècles à venir. Au contraire dimoune pou vine plis faille encore. Mais Hazrat Masih Maood^{as} ti fer nous comprend ki si nous suivre li Allah pou cause ar nous. Nou fine réussi trouve ça vrai mais zot ziska ler eski zot fine réussi trouve kiksoz. La vérité c'est ki l'enseignement de Hazrat Masih Maood^{as} li libérateur, mais zot avec ceki zot représenter zot envi ki bannes dimoune reste dans ene état d'esclavage mentale et d'ignorance. Nou pe appelle dimoune vers Allah et zot pe appel zot couma bannes Juifs vers ene veau. Ça dialogue là pou nepli passer maintenant. Allah pe ordonne autre chose. Si bannes Ahmadis pas pou fer

efforts pou comprend zot pou remplacer par d'autres ki pou plis réceptif à comprendre le vrai message de Hazrat Masih Maood^{as}.

D'après le Saint Coran Satan envoie révélation lor so bannes camarades. Allah dire le prophète «Assurément satan inspire so bannes camarades pou zot dispute avec toi. Et si to obeir zot to pou parmi bannes *moushrik* (bannes ki fer *Shirk*) (6 :122). Alors nou comprend ki ti ena bannes dimounes ki ti camarades de satan ki ti inspirer par satan pou dispute avec le Saint Prophète. Bannes ki inspirer par Allah, le Rahman pas fer comme ça. Hazrat Masih Maood^{as} fine explique nou à plusieurs reprises bannes caractéristiques de bannes dimounes ki inspirer par Allah le Rahman. Bannes ki intéresser pou conne plis lor ça sujet là capave lire *Essence of Islam* Vol 2 page 31-127. Livre li disponible en ligne a http://www.alislam.org/library/browse/book/The_Essence_of_Islam.

Bannes jeunesse capave alle lire et essaye comprend ceki Hazrat Masih Maood^{as} fine dire nou et pas contente zot de ceki bannes mollah ignorants continuer dire zotte. Alors nous comprend facilement bannes ki dispute avec celui ki dire ki li vinne de coté Allah zot inspirer par zot camarade satan mais zot pas conscient de ça et zot penser zot pe fer ene bon travail. Bannes dimounes ki pe cherche la vérité zot ena tous droits pou vine cause avec ene envoyé d'Allah et pose li toute sorte qualité question pourvue ki zot animer par le désir pou comprend et non pas pou disputer et essaye prouver ki li fausse. Alors dans nou cas nou trouver ki tous bannes ki dispute avec nou pou essaye prouver ki nous fausse c'est bannes dimounes ki satan pe inspirer (pe donne zot ilham) pou zot fer so travail, mais zot pas conscient ki zot ene marionnette dans so la main. Ki fer zot pas conscient? Parski zot pena connexion avec le Rahman ki ti pou donne zot la sagesse nécessaire pou fer le bien et fer ceki plaire Li. Allah dire nous dans le Saint Coran :*Et lor mo bannes serviteurs to pena auquene capacité*. Alors zot essaye combattre l'envoyé d'Allah et zot penser ki zot pe fer quelque chose de bien. Et pourtant quand zot fer comme ça zot pe tout simplement prépare zot chemin pou l'enfer d'après le Saint Coran. Alors le Majlis Amla aster capave conner dans ki camp zot et bannes ki suive zot été et ki c'est pas moi ki pe subir l'influence satanique! Moi par la Grace d'Allah mo combattre Satan et si Allah pas ti aide moi contre li mo ti pou parmi zot.

KI FER DIMOUNES PAS COMPREND KI ETE REVELATIONS

D'après ceci Allah fine fer nou comprend pas tout dimoune destiner pou gagne revelations. Mais "Allah conner cotte pou place So Message". Mais Hazrat Masih Maood^{as} fine fer nous comprend ki Allah donne bannes dimounes bannes vrais rêves pourki zot capave comprend ki ceci ene messenger dire li capave gagne li dans ene certaine façon. Mais dimoune pas prend ça comme ça. Si zot gagne vrai rêve zot penser ki c'est ene signe de zot distinction. Si ene dimoune pas pratique la vertu so bannes rêves et revelations pas veut dire nanrien. Mais quand même si jamais li trouve ene rêve ki vine vrai li capave gagne ene l'idée ki ceci ene Prophète ou ene envoyé pe dire li capave vrai. Alors n'importe ki sanne la capave gagne ene rêve ki vine vrai mais ça c'est ene quaransixieme partie de l'apostolat d'après ene hadice. Alors pas parski ou fine trouver ki sanne la pou vinne calife ou ene bon dimoune! Nous conne bien tous bannes fracas ki fine suivre.

Alors ki pour nou le corps, Allah fine ordonner ki li développer pendant ene certain temps ensuite li commence dégénérer, pou nous l'âme Allah fine ordonner ki li capave fer bannes progrès spirituel infini. Et ceci pou aide nou l'âme c'est la réponse ki Allah pou donne nou de so part quand nous fer nous bannes *ebadat* couma bizin. Et c'est ça réponse là ki la révélation. Et Hazrat Masih Maood^{as} fine fer nou comprend ki tout dimoune capave goute de bannes revelations selon so bannes efforts et ceci Allah fine ordonner pou li. Mais tout pas pou gagne li au même degré. Et ceci désigne l'homme d'Allah c'est la quantité et la fréquence de so bannes revelations. Aster bannes dimounes ki pas même conscient ki bizin développe zot l'âme, couma zot pou capave comprend ki révélation été. Alors dans zot ignorance zot rejette révélation. Dans le Jamaat Ahmadiyya ene majorité de so bannes missionnaires dans ça catégorie là. Et couma mo fine déjà dire ailleurs nou pou attanne bien longtemps dans le Jamaat avant ki nou trouve ene missionnaire de la trempe de Molvi Ghulam Rasool Rajeki^{ra} ou bien Molvi Baqapuri^{ra} (ki Allah illumine zot tombes).

Ene l'autre l'exemple nou capave donner c'est le monde des insectes. Parmi bannes insectes ena bannes mouches d'abeilles. Zot extrêmement bénéfique à l'homme, zot prépare du miel dans ki ena remède pou beaucoup de bannes maladies. Ensuite ou trouver ki ena moustique malaria. Grace à so piqure au

moins 850,000 dimoune mort tous les ans. Comme ça même ena plusieurs les autres mouches et moustiques ki ena bannes les autres fonctions dans la nature. Eski ou penser ki dans le règne de bannes insectes moustique malaria ou bien mouche jaunes capave comprend ki pe passer dans ene mouche abeille et ki permette li produire le miel ki li produire. Bannes les autres pas capave comprend le travail de mouche à miel parski zot nature li différent et zot pas conne ça fonction supérieur ki produire du miel la. Zot nature li bien inferieur et donc zot reste dans l'ignorance et zot fer ceki conforme à zot nature c'est-à-dire piquer! Voila le cas de bannes dimoune ki pas disposer fer la purification nécessaire de zot l'âme pour ki zot capave produire le miel spirituel ki nou appelle en d'autre mots "la révélation".

GRAND PECHE DE BANNES MEMBRES DE L'AMLA

Bannes membres du Amla de l'île Maurice fine fer ene grand péché quand zot fine approuve ça lettre circulaire ki dire ki mo ene menteur sans ki zot fine donne auquene preuve pou prouve mo mensonge. Celui ki fine jouer le rôle principal dans ça zaffaire là li le premier responsable de ça grand accusation (*buhtané kabir*) là. Bannes ki pas repentir pou zot action zot pou charrier ene lourd fardeau le jour du jugement dernier. Zot pas fine contente zot pou fer ene accusation gratuite sans preuves lor moi, mais zot fine pousse bannes les autres dimoune pou suivre zot dans ça mauvais simin là. Majlis Amla et le groupe de cinq envie créer désordre dans le Jamaat et dans l'île Maurice et zot pe incite bannes dimoune pou repenne la malpropreté ki zot fine écrire. Mo dire ki Allah pou deal avec zot et tous bannes ki soutenir zot dans zot bannes ruses et magouilles en temps et lieu. L'avenir pou montrer nous ki sanne la ki lor simin droite et ki sanne là ki bannes égarés. Bannes membres du Amla ki repentir et fer conner ki zotte dissocier zotte avec ça lettre là mo espérer ki Allah pardonne zotte.

VERSETS DU SAINT CORAN KI DIMANNE REFLECTION

Dans le Saint Coran Allah fer nous comprend ki quand bannes dimoune dire ene envoyé ou bien ene messenger ki li fausse ou bien menteur so réponse trouve dans verset suivant:

Bannes ki pas croire dire ki to pas ene envoyé. Dire zot Allah suffit comme ene témoin entre moi et zot. Et celui ki conne Le Livre dans So lizié aussi *ene témoin* (13 :43)

Et ene l'autre place Allah dire:

Dire "ki plis grand témoignage!" Dire "Allah" Li témoin entre moi et zot"(6 :20)

Alors nous trouver ki Allah diboute pou témoigne pou celui ki li fine envoyé. Et pena plis grand témoin ki li. Dimoune ki comprend le Livre d'Allah aussi fer ça témoignage là. Celui ki pas comprend le livre d'Allah pou rejette le message. Si majorité musulmans ti comprend le livre d'Allah zot pas ti pou rejette Hazrat Masih Maood^{as}. Malheureusement ena fine accepter li mais zot rejette so bannes enseignements et zot rejette dimounes ki vinne apres li! Dans ene l'autre verset Allah dire:

Et fine dire à bannes messagers avant toi ki zot menteurs, mais zot fine montrer patience lor ça mensonge ki ti pe accuse zot là ziska ki nou l'aide arrive zot. Personne pas capave change les paroles d'Allah. Et to conne déjà nouvelles a propos de bannes Messagers. (6 :35)

Li pas étonnant ki dimoune bizin vine de l'avant et dire moi ki mo menteur. C'est ça bannes dimounes là zot destin ki zot bizin fer comme ça. Allah trouve tout. Et li pou agir avec zot couma zot mériter.

Ene l'autre place Allah dire:

Bannes ki dire ki Allah pas fine révèle nanrien zot pas comprend Allah So Grandeur couma zot ti bizin comprend li (6 :92)

Encore ene fois c'est bannes dimounes ki ignorant ki dire ki Allah pas fine révèle nanrien. Zot ignorants parski zot pas conne le Livre d'Allah. Ene l'autre place Allah dire :

Et Nous conner ki ceki zot dire fer toi du mal. Ça bannes la pas pe dire toi menteur, mais zot pe rejette bannes signes de To Seigneur"(6 :34)

Dans ene l'autre verset Allah dire:

"Et bannes la dire "li fine fabrique ça" Dire " Si mo fine fabrique li péché pou moi et mo loin avec tous bannes péchés ki zot commette". (11 :37)

Alors mo dimanne bannes membres du Amla réfléchi lor tous ça bannes versets la et guetter et juger si zot fine bien agir ou bien non quand zot fine mette accusation de menteur lor moi et zot fine persuade selment cinq aveugles pou suivre li?

REVELATIONS SATANIQUES OU DE ALLAH LE RAHMAN

Mo fine déjà dire la haut ki d'après le Saint Coran Satan inspire so bannes camarades et Satan so travaille c'est ki li bizin éloigne nous d'Allah. Donc Satan pou fer tout pourki ene dimoune li désobéir Allah. C'est pourquoi Allah fine dire à plusieurs reprises dans le Saint Coran " Satan ene vrai ennemi pou zot. Traite li comme ene ennemi. Li appelle so bannes pou ki zot rentre dans difé"(35 :7). Alors satan li pou incite dimoune pou désobéir Allah. Jamais li pou dire ene dimoune fer do'a pou to rapproche avec Allah. Mais ki nou fine appranne ki nou pas ti conner à travers la revelations ? Allah enseigne nou pou dire " **O Allah parfume nous de *tauhid* et encense nous de renoncement aux créatures et à tout autre que Toi en général.**" Eski Satan pou donne ene dimoune ene révélation pareil. Quand Allah enseigne par révélation pou dire :"**O Mon Seigneur ! Enseigne-moi dans sa vivante réalité la puissance de cette formule "*Laa ilaha illallah*". Et avec la vérité de cet appel fortifie mon cœur, submerge mon être dans l'essence de "*Laa ilaha illallah*" et garde moi Oh Mon Seigneur auprès de Toi et fais que je Te vois dans Tes œuvres jusqu'à ce que je vois rien d'autres que Tes actes et Tes attributs !"**" Au début mois de Mars 2011 pendant ki mo pe écrire ça livret la, mo recevoir en arabe "*Fa kaifa iza jama'naahoum le yawmin laa ghaiba fihe wa wouffeyat koullo nafsin maa amelat wa houn laa youzlamoune. Qolillahoumma malikal mulké to'til moulka man tashhao wa tanzeoul moulka mim man tashaa wa to'izzo man tashaa wa to zillo man tashaa'o beyadecal khair Innaka ala koulle shay'in qadir.*". Traduction li comme suit : ' **Couma ça pou été quand nou pou rassembler zot tous ensemble ça jour cot pena auquene doute lor là et nou pou récompense chacun pour ceki li fine fer et pas pou fer injustice avec personne. Dire ' Oh Allah, Maitre de la souveraineté, To accorde la souveraineté a ki To envie et To prend li de ki To envie. To honore ki To envie et To deshonore ki To envie. Dans To la main ena tout**

ceki bon. Assurément To ena Pouvoir lor tout kikchose." Satan pou vinne dire ça. Quand mo constate l'énorme difficulté devant moi dans les premiers jours de la manifestation et mo recevoir "**You can swim against the current**" c'est-à-dire " to capave nage contre courant", ou appelle ça revelations sataniques ! C'est pourquoi mo dire c'est selment parski ou pas conner ki Hazrat Masih Maood ^{as} fine dire et fine recevoir ki ou capave dire bannes mensonges pareils. Par la Grace d'Allah mo capave écrire des pages de revelations. Mais bannes ki mo pe adresser pas conne apprécier ça. Et pourtant dans le monde zot ti bizin être bannes premiers qualifiés pou comprend ça bannes revelations là parski zot vinne depi Jamaat de Hazrat Masih Maood ^{as}.

SELON ZOT, MALEDICTION D'ALLAH POU TOMBE LOR MOI

Bannes ki croire zot conne Allah menace moi ki si mo fer zot serment anti-coran mo pas pou capave échappe avec malediction d'Allah. Mo dire ki c'est Allah, le Rahman ki donne moi mo bannes revelations. Bannes Ahmadis mémoire-courte bizin rappel ki le quatrième calife ti dire pou nou quand li ti mette nou en dehors Jamaat en 2001. Alle ouvert dossier et guetter. Li ti souhaite nou le mal. Et le Saint Prophète fine dire nou ki nou pas bizin maudire personne dans ene hadice. Et pourtant en tant ki calife li fine fer li. Alors Allah pas fine content du tout avec ça façon de fer la et Allah fine rappelle li avant ki li fer encore dégât au nom d'Allah ! Donc depi dix ans nous bannes ennemis frères-hier et bannes sœurs aussi pé attanne même pou malheur frappe nous. Mais ki nou pe trouver malheur pe frappe cote nou ou bien ailleurs ? Pendant ça dix dernières années la, Allah fine continuer donne nous pli grand cadeau spirituel ki Allah donne So bannes Serviteurs choisis selon Hazrat Masih Maood^{as}, c'est-à-dire la révélation de So part. Et ki Jamaat Ahmadiyya fine gagner lor plan international? Ene série de dénonciation de bannes manière-faire non islamiques à l'intérieur fine publier lor le net et pe encore continuer ziska azordi et personne pas ose réfute ceki pe dire. Ceki fine arriver c'est ki purdah fine lever lor certaines manières faire de la direction de Jamaat. Et lor le plan local ki fine arriver. Ene "lion rugissant défenseur du khilafat" fine fer l'objet d'ene enquête ordonner par le calife limeme. Alors cot l'honneur cot humiliation ? Mo laisse zot reponne. Ene calife fine disparaitre. Li fine remplacer par ene l'autre ki pas comprend travail là du tout. Contre tout attente Allah empêche li alle célébrer centenaire Jamaat dans Qadian. Eski ou

comprend kifer li pas ti visite Maurice, premier Jamaat en dehors l'Inde, a l'occasion centenaire khilafat ? Tout ene série de revers. Si mo continuer mo capave dresse ene longue la liste de ki fine arrive le Jamaat Ahmadiyya International ces dix dernières années.

Et Allah fine dire So Serviteur " Eski Allah pas suffit pou So serviteur". Et puisque bannes dans Jamaat pe attanne avec la bougie rouge pour ene grand malheur tombe lor nou Allah fine dire moi à plusieurs reprises "Bannes la souhaiter ki malheur tombe lor zot; c'est lor banne là ki malheur pou tomber". Alors si zot vrai même ena Taqwa dans zot le cœur fer efforts pou comprendre ceci pe dire zot. Comprend ki quand Allah dire So Serviteur "Allah avec toi et avec bannes ki suive toi parmi bannes croyants" Allah jamais pou envoyer So Malediction lor bannes dimounes pareil quand même ki kantité zot bannes ennemis souhaite ça.

MO BANNES SUPPLICATIONS

Couma mo fine déjà dire mo pas capave suivre amir- molvi so prescription pou mo fer supplications à Allah. Moi mo ene élève de Hazrat Masih Maood^{as}. Depi bien longtemps Allah ti fine fini commence attirer moi vers li. Et mo pena nanrien pou appranne avec bannes ki fine abandonne bannes enseignements de Hazrat Masih Maood^{as}. Moi mo pou adresse Allah dans bannes paroles suivants:

O mo Seigneur Toi ki Le Puissant et Le Maître du monde, Toi To conner couma To fine aide moi dans mo la vie. Toi ki fine fer beaucoup kikchose pou moi cote To fine manifester To Présence. Toi ki fine fer moi comprendre ki To Manifestation à Maurice ene réponse de mo bannes humbles supplications. Toi ki conner ki bannes affaires ti pe fatiguer moi dans doctrines Jamaat Ahmadiyya. To fine aide moi et mo bannes camarades pou libère nou de ça oppression ki le Nizaamé Jamaat ti pe exercer lor nous. Quand To fine aide nous pou comprendre réalité de la vie, To fine attache nous avec Toi et libère nou de tout autre que Toi. Mo conscient de tous To bannes faveurs malgré mo bannes innombrables faiblesses. To conner O Allah ki kantité le cœur de Zafrullah pécheur li soupire pou Toi. Ziste Toi ki conner ki kantité larmes li fine verser devant Toi. Ziste Toi ki conner ki ça bannes paroles avec lequel To fine adresse li. C'est par

To permission ki li fine dire bannes dimounes ki to fine élève li comme ene Imam pou bannes dimounes ki pieux. Par To Grace, malgré so faiblesse li fine alle de l'avant pou dire bannes chefs Ahmadiyya incluant zot calife ki zot dans l'erreur lor certaines affaires. Et To conner ki zot fine ignore li. Malgré tout To continuer console li et so bannes camarades et to continuer donne li bannes *ilhams* de To part.

Azordi jour bannes membres du Majlis Amla pousser par zot amir et le molvi Basharuth Naveed, missionnaire en chef Jamaat Ahmadiyya à Maurice fine écrire ene lettre contre moi et zot pas fine gagne courage pou signer et envoye moi zot lettre. Cachiette cachiette zot pe essaye fer bannes Ahmadis ignorants signe ça lettre là et envoye moi. Mais malgré zot bannes efforts couma To conner ziste cinq dimounes fine tombe dans zot la trappe. Zot pé fer grands efforts pou zot contrecarrer moi mais To pas pe laisse zot réussir!

O Allah Le Puissant, Toi ki fine donne moi plusieurs revelations de victoire lor mo bannes ennemis continuer fer bannes dimounes là zot bannes efforts tombe dans dilo couma To fine fer ziska ler. Fer zot réaliser ki moi mo To dimoune et serviteur de To Messie, Mirza Ghulam Ahmad^{as} et ki zot pas bizin essaye combattre moi sinon a part humiliation zot pas pou trouve nanrien lor zot simin. Mo prier ki To ouvert zot le cœur pou ki zot capave comprend exactement ki Hazrat Masih fine dire et expliquer. Mais si zot entêté lor la voie ki zot fine prend et zot pas disposer pou corrige zot donne bannes ki chefs parmi zot punition ki zot mérité.

O Allah ! Muctar Jowahir fine dire moi rappelle Zia ul Haq. Mo pas pou dire li rappelle personne. Mais mo dimanne Toi ki To fer li rappelle ki sanne là Toi parski li pas conner ki sanne là Toi.

- *Wase'a Rabbona koulla shay'in ilma Alallahe tawakkalna Rabbanaftah baynana wa bayna qawmena bil haqqé wa anta khayroul Faateheen-* Nou Seigneur englobe tout dans So Connaissance. Lor Li nous place nous confiance. O Nous Maitre juge entre nous et nous peuple avec la vérité. To meilleur de bannes ki fer Jugement. (7:90)

- *Faftah bayni wa baynahoum fathan wa najjeni wa mam ma'eya menal mo'meneen* – (O Allah) décide entre nous et bannes là par ene victoire et protège moi et bannes croyants ki avec moi. (26:119)
- *Rabbihkoum bil haqqé wa rabbonar Rahmaanoul moustaaanon ala maa yasefoune*- O Nous Maitre juge avec la vérité; Nous Seigneur li Le Rahman de ki nou cherche l'aide contre ceki zot pe alléguer. (21:113)
- *Rabbinsurni bema kazzabouni*-‘O Mo Seigneur aide moi parski zot fine traite moi de menteur’ (40-27)

ENE APPEL

O bannes Ahmadis! Allah fine choisir ene Imam parmi zot pou zot. Si Allah fine fer ça c'est parski li fine ouler fer ene faveur spécial lor zot. Par la Grace d'Allah mo ena des preuves de la part de mo Seigneur pou ceki mo pe dire zot. Mais zot croire dans le système de khilafat. Moi et mo bannes camarades aussi ti croire dans ça système là. Et pas ti ena personne ki ti aussi *diehard* (fanatique) ki moi pou défanne le calife ou le système de khilafat. Mais Allah fine fer So Faveur lor nous et Li fine aide nou pou comprendre ki ça système de khilafat là li pas reponne à tous bannes besoins du Jamaat. Au fil du temps pendant ça dix dernières années là nou fine arriver à comprendre beaucoup plis bannes affaires ki nou ti conner avant. Et nous fine arriver à comprendre ki ena beaucoup bannes affaires pas fine fer correctement dan le Jamaat. Ena bannes parti de l'histoire du Jamaat ki fine reste dans noir et personne pas disposer pou éclaircir ça bannes pans de l'histoire là. Hazrat Masih Maood^{as} fine fer nou comprend ki la porte de la révélation pou ouvert ziska la fin du monde. Mais Jamaat dire ki ça vrai mais zot pas croire ki ene l'autre dimoune capave gagne ene mission de la part d'Allah à part le calife régnant. Bannes califes fine modifier ceki Hazrat Masih Maood^{as} fine dire et zot pas disposer pou cause lor ça bannes affaires là. Le Jamaat so bannes agents c'est-à-dire bannes missionnaires zot alle partout dans le monde pou explique ceki bannes califes dire et pas ceki Hazrat Masih Maood^{as} dire. Si ou alle dire zot ça zot pou dire ou ki mo pe coze menti. C'est pourquoi mo fine dire zot a nou fer ene débat ouvert lor YouTube et laisse bannes Ahmadis guetter. Mais mo conner ki zot pou refuser parski bannes molvi mollah conner ki ceki mo pe dire li vrai. Mais couma bannes Juifs zot pe cachiette la vérité et zot mélange fausseté et la vérité.

Guette dans so annonce le vendredi 4 mars 2011 couma l'amir fine dire ene hadice pou fer zot croire ki bizin reste fidele avec le khilafat dans tout bannes circonstances. Pou commencer li pas fine cite cot li fine tire ça hadice là. A ma connaissance ça hadice là pas existe dans version ki li fine mentionne li. Dans l'histoire de l'Islam fine ena beaucoup bannes politiciens mentères ki pas ti hésiter pou invente hadice pou justifier zot bannes actions malsaines. C'est ceki l'amir fine essaye fer vendredi dernier. Li ene dimoune totalement discrédité dans le Jamaat mais li pe reste au pouvoir par l'appui ki li pe gagner du centre. Meilleur version de ça hadice là sorti dans Muslim et mo fine mentionne li dans mo ti livret "**Pena Obeissance Si Dire Ou Désobéir Allah Bizin Obeir Seulement ceki Ma'roof**" dans page 15 et 16. Mo pas pou répète ça hadice là ici encore ene fois. Mo dimanne ou ki ou alle relire li et guette ki manipulation lamir fine fer pou fer ou croire ceki pas exister. La bas fine cause le *Jama'atoul Mouslemeen* et zot chef (*wa Imamohoum*) et lamir dire ou ki fine cause khilafat. Même si nou d'accord pou ene instant ki ene tel hadice exister couma lamir fine citer alors nou bizin conner ki Hazrat Masih Maood^{as} fine dire lor ça sujet là. Eski li fine dire nou alle accepter bannes khalifas ou bien li fine dire nou accepter dimounes ki élever par l'Esprit Saint par Allah ? Et nous conner ki le Jamaat diriger par le khalifa rode ignore ceki Hazrat Masih Maood^{as} fine dire lor ça sujet là ! Alors ki plis important ceki calife dire et hadice ou bien ceki Hazrat Masih Maood^{as} fine dire ? Juger ou même.

Puisque li fine envie fer dimoune conner couma Hazrat Huzaiifa ti cause lor bannes troubles ki ti pou vini dans l'avenir laisse mo cite ou ene hadice cotte le Saint Prophète^{saw} fine cause lor la disparition de l'honnêteté dans la société. Hazrat Huzaiifa^{ra} dire ki le Saint Prophète^{saw} fine dire deux hadices. Ene fine fini arriver et mo pe attanne pou l'autre accomplir. Le Saint Prophète^{saw} fine dire : Ti place confiance dans plis profond de le cœur de bannes dimounes. Ler la Allah fine desanne le Saint Coran et dimounes fine appranne li et zot fine appranne aussi la sounna. Ler la le Saint Prophète^{saw} fine cause ar nou couma confiance fine disparaître. Li dire: ene dimoune pou gagne ene ti sommeil et kalité ki capave fer li confiance pou disparaître depi so le cœur. Et li pou gagne ene l'autre ti sommeil et ça kalité de fer li confiance pou disparaître de so le cœur et li pou quitte ene ti marque. Li pou ré dormi et et la kalité de fer li confiance pou disparaître de so le cœur et li pou quitte l'impression d'ene

cloche ki quitter si ene la braise fine tombe lor ou li pied. Li pou enfler mais pas pou ena rien la dans. Le Prophète fine prend ene cailloux et li fine fer li roule lor so li pied et ler la li fine dire : Bannes dimounes pou fer bannes transactions entre zotte et à peine si ene kikene pou retourne bannes kikchose ki ti donne li pou garder. Et pour ena si peu de bannes dimounes honnête ziska dimounes pou dire " Dans tel tribu ena ene dimoune honnête". Et zot pou aussi dire à propos d'ene certain dimoune "Guette ça dimoune la couma li prend précaution, couma so l'esprit large et couma li intelligent mais dans so le cœur pas pou ena autant la foi ki ene la grain moutarde." Hazrat Huzaifa dire: "mo fine passe par bannes le temps cot mo pas ti soucier moi avec ki sanne là mo fer ene transaction. Si li ti ene musulman so la foi ti pou force li pou racquitte li de so bannes obligations envers moi. Si li ti ene Juif ou bien ene Chrétien celui ki détenir pouvoir ti pou oblige li racquitte li de so bannes obligations envers moi. Mais azordi jour mo pou fer bannes transactions seulement avec untel ou bien untel. (Hadice Muslim Kitabul Iman)

Ça hadice là beaucoup plis approprié pou bannes Ahmadis conner cote confiance trouver et avec ki sanne là zot capave fer bannes affaires ! Médite lor ça hadice là et guetter si li pas fine accomplit dans Jamaat cot lamir li le chef !

Mo envie refaire bannes dimounes comprend ki le pouvoir pas intéresse moi. Kikchose ki plis intéresse moi c'est situation de bannes Ahmadis apres la mort. Par la Grace d'Allah Hazrat Masih Maood^{as} fine lègue nous ene grand héritage spirituel mais bannes ki fine exerce le pouvoir fine dilapide ça héritage là. Mais Allah pas fine abandonne nous. Li fine donne nous la distinction principale ki fer nou conne So Présence pou ki nou dire bannes ki pe détenir le pouvoir ki zot pe mal fer. Guette azordi combien de bannes Ahmadis sincères ki conner ki kantité malpropreté fine ena dan le Jamaat, mais zot totalement impuissant devant la puissance de Tabshir et zot pe bizin subir ça l'odeur malpropre là malgré zot même. Eski ou penser ki Allah ti pou laisse nous lor ene situation pareil. Mo dire ou ki ceki mo pe dire et mo représenter li plis proche avec ceki Hazrat Masih Maood^{as} fine dire ki ceki le calife et Tabshir et bannes amirs pe dire. C'est ça bannes là ki pe fer tout pou garde zot pouvoir. Zot fine fini avouer défaite lor doctrine parski zot refuse dialoguer. Combien de fois fine cite ça extrait suivant là un peu partout:

"Bannes dimounes de mo communauté pou fer tellement progrès dans la connaissance et sagesse ki zot pou étonne les autres par la lumière de zot véracité et par zot bannes arguments et zot bannes signes" (*Tajalliyat-ellahiyyah, pp. 17*)

Si le calife et so bannes representants couma lamir, le missionnaire en charge et bannes membres Majlis Amla dire ki zot bannes vrais representants de Hazrat Masih Maood^{as} zot ti bizin vine de l'avant avec zot la lumière, zot bannes signes zot sagesse pou prouve so véracité. Mais zot pas pou capav parski c'est pas zot ki représente li. Azordi jour li représenté par nous ki pe défanne so vrais enseignements. Alors l'Ahmadi capave fer la différence. Ki sanne là ki pe challenge ki sanne là ? Ki sanne là so campagne mobahela fine fer fizette ar li même ki li fine bizin quitte terrain avant même ki mo fine fer conne mo l'opinion. Tout pécheur ki mo été, en tant ki suivant de Hazrat Masih Maood^{as}, Allah fine dire moi pareil couma Li ti dire li "*Wa jaa'eloullazinat-tabaouka fawqal lazina kafarou ila yawmil qiyamaté*" ki veut dire "Et nou pou fer bannes dimounes ki suive toi gagne le dessus lor bannes dimounes ki pas croire dan toi ziska jour du qiyamat". Aster nou bannes ex frères ki croire dans zot khilafat bizin vine de l'avant et casse nou bannes arguments si zot sincères dans zot bannes revendications ki c'est zot bannes vrais representants de Hazrat Masih Maood^{as}.

Khilafat Ahmadiyya fine dépasse bannes bornes imposés par Allah. Zot fine modifier bannes enseignements de Hazrat Masih Maood^{as}. Zot fine fer halal ceki Allah fine fer haram. Zot fine essaye repanne la haine dans Jamaat Hazrat Masih Maood^{as}. Alors le khilafat ki la plupart bannes Ahmadis croire pou résoudre bannes problèmes dans le monde li pe montrer li incapable pou régler problème dans Jamaat limeme. Azordi ça institution là fine produire bannes chefs couma amir de l'ile Maurice et bannes molvi couma Basharuth Naveed et Tabshir couma nous conne li. Donc ça institution là fine dégrade li même. Et Allah fine envie fer bannes Ahmadis comprend ki bannes idées ki khilafat Ahmadiyya mette de l'avant zot pas vrai. Reforme pas pou capav fer par zot. Reforme fer quand Allah fer ene dimoune diboute par révélation et dire li fer le travail de reforme. C'est ça ki Hazrat Masih fine enseigne nou et c'est ça ki la vérité. Le reste c'est bannes fabrications ki fine mette en place pou domine l'esprit bannes dimounes innocents.

Alors mo redire ou ki mo pas du tout intéresser pou contrôle Jamaat so l'argent. Ceci mo envie vraiment c'est ki mo capave aide tous bannes Ahmadis pou zot vivre ene la vie selon les enseignements de Hazrat Masih Maood^{as}. Azordi c'est pas le cas. Azordi la plupart bannes dimounes pe vivre ene la vie routine. Zot pena auquene moyen pou conne zot défauts et ki zot bizin fer pou améiore zot même. Zot chef dans Maurice fine discrédite li-meme et so fonction par so comportement. Les autres pe jouer bannes jouer politiques pou élimine li et zot pas pe réussi. Moi mo intéresser pou fer l'éducation bannes jeunes pou ki zot capav vine bannes dimounes ki comprend et mette en pratique les enseignements de l'Islam couma Hazrat Masih Maood^{as} fine montrer nou. Par la Grace d'Allah par bannes revelations ki Allah fine donne moi mo capave mieux comprendre ki Allah fine dire Hazrat Masih Maood^{as} parski Allah fine donne moi bannes revelations similaires. Pou bannes Ahmadis mo pas du tout l'ennemi à abattre couma ou amir ou soi so missionnaire en charge rode fer ou croire. En toute humilité mo capave dire ou ki mo ene fruit ki prouver ki jardin de Ahmad li encore vert. Alors pas laisse ou guider par ou passion ou bien ou obéissance aveugle. Allah ouler donne ou meilleur kikchose ki ou ena et arrête dire "nou pou suivre ceci nou bannes parents fine suivre" même si pe donne ou kikchose ki meilleur.

Mo redire mo disposer pou dialogue avec bannes dimounes ki envie cherche la vérité et mo invite zot contacter moi. Ki Allah guide zot lor simin So Plaisir.

Zafrullah Domun

Imam De Bannes Pieux

Jamaat Ahmadiyya Al Mouslemeen

Les Guibies, Pailles

Ile Maurice

8 Mars 2011/ 3 Rabi'ous Sani1432.

Zafrullah Domun li ene Imam ki Allah finne nommer par révélation pou bannes dimounes ki cultive So Crainte dans zot le cœur. Actuellement li à la tête de Jamaat Ahmadiyya Al Mouslemeen. Li et so bannes camarades zot finne engage zot pou maintenir bannes vrais enseignements de Hazrat Mirza Ghulam Ahmad^{as} (1835-1908), le Messie Promis et Mahdi, fondateur de Jamaat Ahmadiyya. Zot pé fer bannes efforts pou fer bannes dimounes conner ki le fondateur du Jamaat Ahmadiyya finne dire et ki pé pratiquer azordi par la direction du Jamaat. Li finne écrire trois ti livrets en créole cotte li finne expliquer so bannes idées. Titre de ça bannes livrets la comme suit :(1) "*O Qutoub uddin guette Mo Jamaat, occupe toi de li*"(2) *Sermons de Zafrullah Domun Volume 1*(3) "*Pena obéissance si dire ou désobéir à Allah, bizin obeir seulement ceki ma'roof.*" Ou capave gagne plisse informations lor zot mission lor **www.jaam-international.org**. Lor le website ou capav lire ene profil de Imam Zafrullah et aussi tous so bannes sermons de vendredis en Anglais. Ou capav aussi lire bannes les autres articles li finne écrire. Imam Zafrullah déclarer ki li ena l'autorisation de la part d'Allah pou fer so mission et fer bannes dimounes surtout bannes Ahmadis conner cotte la direction du Jamaat finne écarte li de bannes vrais enseignements et finne adopter bannes ki fausses. Pou l'honneur et l'intégrité de Hazrat Mirza Ghulam Ahmad li important ki bizin ramène Jamaat lor so bannes enseignements fondamentales. Si ou intéresser pou contacter li pou partage ou bannes idées ou pou pose bannes questions, ou pou demande bannes clarifications ou capave envoye li ene email à **contact@jaam-international.org**.